

Date – 25/03/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. April ni 19-a Mizoram Lok Sabha bial inthlan vote thlak turah vawiina an candidate puang ur BJP tih loh party liante chuan an party candidate tur an puang tawh.
2. Tun hnaia Khumtung khaw mi 67-in an eisual Bekang umah khan Khawsikpui thlen theitu natna hrik hmuh chhuah a ni.
3. External Affairs Minister Dr S Jaishankar-a chuan Article 370 chuan hnam pawia a khawih a, Jammu and Kashmir hmasawna daltu a ni a ti.
4. Nigeria hmar thlang, Kaduna state-a naupang rukbo zinga 137 chu chhuah an ni.

<><><>

BATTLE LINES DRAWN FOR LS POLLS

April ni 19-a Mizoram Lok Sabha bial inthlan vote thlak turah political party te an inbuatsaih chho mek a, BJP tih loh party lian chuan an party candidate tur an puang tawh.

Mizoram Assembly-a MLA an neih zat atanga chhûta ‘party lian’ ti-a sawi theihte chu ZPM, MNF, BJP leh MPCC te an ni a. MLA nei ve lo PC party-in an candidate an puang tawh a. Kum 2019-a Independent-a Lok Sabha inthlan lo chuh tawhtu, Pu Lalhriatrenga Chhange chuan independent bawka chuh leh a tum tih social media lamah sawirik a ni.

Rorel lai ZPM chuan Pu Richard Vanlalhmangaiha, Aizawl Venghluia cheng chu Parliament inthlanpuia an party hminga Mizoram bial chuh turin an thlang fel tawh a. Ani hian Zirtawpni khan a nomination pawh Aizawl DEO leh Returning officer hmaah a thelut tawh a. MNF chuan Rajya Sabha MP ni lai Pu K. Vanlalvena chu Lok Sabha Mizoram bial chuh tur hian an thlang tawh bawka a. MPCC chuan MPS hlui Home Secretary atanga chawl ta Pu Lalbiakzama chu an party aiawh tur a nih thu an puang tawh a. PC Party pawhin Pi Rita Malsawmi hming an puang tawh. BJP State unit chuan vawiin chhun dar 12 hian an party aiawha Lok Sabha inthlan chuh tur an puang ve dawn a, an party aiawh turin State BJP Unit President Pu Vanlalhmuaka chu an theh chhuak dawn a ni.

(Desk)

<><><>

KHUMTUNG FOOD POISONING

Tun hnaia Khumtung khaw mi 67-in an eisuala nausen pakhatin a thih phah Bekang umah khan Khawsikpui (typhoid) thlen theitu natna hrik ‘Salmonella Typhi’ hmuh chhuah a ni.

Health and Family Welfare Department-a Food and Drugs Administration Joint Director Pu Lalsawma’n Akashvani Aizawl a hrilh danin Khumtung-ah hian mithiamte kalin an Bekang eisual ‘sample’ an la a. Chu chu Selesiha College of Veterinary Science and Animal Husbandry Laboratory-ah endik a ni a; Salmonella Typhi natna hrik hi hmuhchhuah a ni ta a ni. Mithiamte chuan Salmonella Typhi hi khawsikpui thlen theitu bacteria a ni a, tui emaw ei tur tihbawlhhlawh leh thianghlim tawk lovah a darh thei a. Mihringin a lem hnu-ah lo puangin thisen kalkawngah a taidarh ta thin a ni, an ti.

Khumtung khuaa chhungkaw engemawzatin March ni 9-a UPC Mizoram Kohhran hmeichhe pawlin sumtuakna atana an zawrh Bekang um chu an lei a. Hemi ni leh a tuk Pathianni-ah mi thahnem tak an dam loh phah avangin a na zual mi 45-te chu Aizawl Damdawi in hrang hranga enkawl turin Khumtung health sub centre atanga thawn an ni a. Aizawl Civil Hospital-a enkawl kum 1 leh thla kaw mi Lalthansangi chu March ni 15 zan khan a thi a. Ani hi nausen mai a la nih avangin Bekang um hi ei lo tura ngai an awm a, a nu hnute a hnek vanga thi-a ngaihna a awm chungin a chhungte ka atanga hriat danin a ei ve niin a lang.

Bekang um eisual zingah hian mi 2, State Referral Hospital, Falkawna enkawl mekte tih loh chu dam takin Damdawi in atangin an chhuak vek tawh a ni.

(Desk/C. Lalhminghlua, PTC Serchhip)

<><><>

EX-SERVICEMEN

Assam Rifles Ex-Servicemen te chuan Veer Naris, hmeithaite leh an chhungte nen Inrinni khan Aizawla 23 Sector Assam Rifles, Khatla hmunah Veterans Day an hmang.

Veterans Day lawmna hi 23 Sector Assam Rifles Deputy Inspector General Brig. Girish Upadhyaya-a’n a hmanpui a. He hunah hian Ex-Servicemen, Veer Naris, Hmeithai te leh an laichinte harsatna hrang hrangah Assam Rifles Welfare kaltlangin HQ 23 Sector Assam Rifles chuan puihna kimchang pek an tum thu tarlan a ni a. Veterans Day hmannaah hian stall hrang hrang siamin Medical Camp, ECHS, Helpdesk, Banking helpdesk, Canteen Store Department leh Ex-Servicemen te hnena hmun leh hmuna hamthatna pek nghal theihna te buatsaih a ni.

He hunah hian Veer Naris, hmeithai leh Ex-Servicemen te Assam Rifles-te tana an thawhhlawkna leh an inpekna hriatreng leh chawimawi na’n 23 Sector Assam Rifles chuan lawmpuina an hlan a ni.

(Corr)

<><><>

AWARENESS CAMPAIGN

Nimin chawhma inkhawm ban khan Thingdawl Venglai Presbyterian Kohhran Hall-ah District Legal Services Authority (DLSA), Kolasib chuan Narcotic Drugs &

Psychotropic Substances Act (ND&PS Act) (Search and Seizure and Punishment) chungchang ah Dan leh hrai zirtirna hun an buatsaih.

Thingdawl Venglai Presbyterian Kohhran Hall-a Dan leh hrai zirhona hun hi Pu B. Lalmuanpuia'n a kaihruai a, Kolasib Fast Tract Court Judge Pu R. Vanlalena, Chief Judicial Magistrate (CJM) cum DLSA Secretary Pi Cacy Malsawmtluangi Ralte leh Pu Zonunmawia, JMFC te chuan kalkhawmte an zirtir.

He hunah hian Thingdawl Venglai Branch KTP member 56 an tel a, Pu R. Vanlalena chuan ND&PS Act bawhchhiate hremna hrang hrangte sawifiahin heng hremna te hi tawh lo turin nun uluk a pawimawh, a ti a. KTP member-te chu POCSO Act chungchang leh inbumna awm thei hrang hrang lakah fimkhur a tul thu a hrilh a ni.

He huna kalkhawmte'n Dan chungchanga zawhna an neihte chhan leh hrilhfiah ngaite hrilhfiah hun hman nghal a ni bawh.

(Andrew Vanlalaiva, PTC Kolasib)



PALM SUNDAY

Isua Krista Jerusalem khawpuia lal anga a luh ni hriatrengna, 'Tumkau Ni' chu nimin khan Mizoram puma Kohhran hrang hrangin hmangin zing karah kawng an zawh.

Tumkau Ni hi Isua Krista krawsa khenbeh hma Pathianni hnunung bera hman thin a ni a. He ni pual hian Mizoram hmun hrang hrangah kohhran hrang hrangin hun an buatsaih a. Kohhran tam zawkah chuan Sunday School zirlai, zirtirtute leh Kohhran mipuite tumkau kengin 'Hosanna' ti a aurualin zing karah kawng an zawh a, Pathian fakna hla te an saho bawh a ni.

Nimin Tumkau Ni pual khan Mizoram chhunga kohhran hrang hrangte chuan chawhma, chawhnu leh zanah inkhawm programme an duang a. Kohhran thenkhatah chuan chawhma Sunday School neiin chawhnu leh zanah Tumkau ni pual hun an ruahman thung. Kohhran thenkhat chuan Tumkau Ni pual hian thupui bik neiin hun an hmang bawh a ni. Mizoram District hrang hrangah pawh kohhran hrang hrangte'n an remchan dan ang zelin Tumkau Ni pual hian hun an hmang a ni.

Kum 1998 Synod chuan Tumkau ni hi Nilai leh Beihruai Thupui Bu-a tihlan thin turin a rel a. Chu thu chu bawhzuiin SEC chuan Sunday School tibuai lova inkhawm tum khat buatsaih thin turin a ti a. Kum 2007 atang erawh chuan inkhawm tum hnih buatsaih thin a ni ta a ni. Kum 2022 Synod Inkhawmpui chuan Tumkau Ni chawhma inkhawm hi 2024 atangin Sunday School awm lovin Tumkau Ni programme-a hman ni rawh se, tiin a rel a. Tumkau Ni programme-ah hian chawhma, chawhnu leh zan inkhawm atan thupui siam a ni a. Chawhma, Chawhnu leh Zanah thupui neiin inkhawm an buatsaih a. Chawhma inkhawmah 'Ngai rawh i Lal i hnenah a lo kal e' tih thupui hman a ni a, chawhnu inkhawmah 'A chungah Isua an chuantir a' tih leh zanah 'Keini kan ngawih chuan lung te tal an au tur a ni' tih hman a ni.

Baptist Church Of Mizoram (BCM) te chuan nimin zing karah 'Tumkau Ni' pualin kawng an zawh a. Kawngzawhna-ah hian Kristian Naupang Pawl (KNP) leh an zirtirtute chuan Isua Krista Jerusalem-a Lal anga a luh hriatreng na'n hian Tumkau chawhniin kawng an zawh a, hla an sak bakah kawng remchangah thu an sawi bawh.

Salvation Army pawhin nimin zing vek khan kohhran dang rualin tawtawrawt nen kawng an zawh a. Tumkau chawia an au rual bakah Pathian fakna hla sain kawng an zawh a ni.

Siaha District chhung khaw hrang hrangah Lal Isua chawimawi nan tumkau kengin naupang leh mipuiin kawng an zawh a. Kohhran lian ber ECM leh kohhran hrang hrangte'n Lal Isua chawimawia tumkau kenga kawngzawh an huaihawt a. Zing kara Pathian fakna leh chawina hman a nih bakah Biak in inkhawmah Lal Isua lalna leh fak leh chawimawi a phu zia thuchah ngaihthlak a ni a. Naupangte'n special Item te nen Pathian fak leh chawimawina hun an hmang bawk. Chawhnu lamah Pathian hming fak leh chawimawiin nilengin kohhran hote an hlim hle.

(Corr/PTCs)

<><><>

ARTICLE 370 CREATED ETHOS OF VIOLENCE AND TERRORISM AND OBSTRUCTED DEVELOPMENT OF J&K: EAM S JAISHANKAR

External Affairs Minister Dr S Jaishankar-a chuan Jammu & Kashmir vohbikna Article 370 chu Indian Constitution-ah hun engemaw chen atan dah lailawk mai a ni a, hnam pawia a khawih a, Jammu and Kashmir hmasawna daltu a ni a ti.

Singapore-a India mite a kawmnaah Dr Jaishankar-a chuan Article 370 chuan inngirrhona, thenhranna, tharum thawhna leh firfiaka chetna a hring a ni a ti a. Tunah erawh chuan a tha zawnga danglamna hmuh theih a ni tawh a ni a ti.

Russia leh India inlaichinna chungchangah Dr Jaishankar-a chuan India chuan Russia nen inlaichinna tha tak a nei thin a ti a. Ram pahnihte hi an thil ngaih pawimawh kawngah an in dawm tawn reng a ni a ti a. India chuan Russia emaw, eng ram emaw pawh an inlaichinna a thlir reng a ngai tih a sawi bawk.

(NewsOnAIR)

<><><>

HOLI TO BE CELEBRATED THROUGHOUT COUNTRY ON MONDAY

Hindu sakhaw betuten rawng kutpui an hman thin Holi chu vawiiin hian ram pumah hman a ni dawn. He kut hian thatnain sual a hnehna a entir a, thal hun lo thleng lawmna kut a ni bawk a ni.

He ni lawmna atan hian Hindu sakhaw betute chuan rawngte inthehin duhsakna an inhlan tawn a, upa zawkte atangin malsawmna an dawng thin bawk a ni.

He ni-ah hian President Droupadi Murmu, Vice President Jagdeep Dhankhar leh Prime Minister Narendra Modi-aten ram mipuite duhsakna an hlan a ni.

(NewsOnAIR)

<><><>

BHARAT BIOTECH STARTS CLINICAL TRIALS OF TUBERCULOSIS VACCINE MTBVAC IN INDIA

Bharat Biotech International Ltd chuan Ngawr hridanna (Tuberculosis vaccine MTBVAC) mihringa enchhinna India-ah an tan tih an sawi.

Hei hi Spanish damdawi lam company Biofabri-in TB venna a siam hnuah TB venna hmasa ber tur a ni a. Mihringa enchhinnaah pawh hian Bharat Biotech leh Biofabri hi an thawk dun zel a ni. He hridanna hi puitling HIV kai lova enchhin a nih hnuin kumin hian HIV kaiah a him dawn em tih enchhin tan leh mek a ni.

(NewsOnAIR)

<><><>

AT LEAST 137 OF NEARLY 300 ABDUCTED SCHOOL CHILDREN IN NIGERIA'S NORTHWESTERN RELEASED AFTER WEEKS IN CAPTIVITY

Kar hnih chuang hren an nih hnuah Nigeria hmar thlang, Kaduna state-naupang 300 dawn rukbo zinga 137 chu nimin khan chhuah an ni.

He thu hi West African military chuan a puang a. Hemi hma hian sawrkar thuchhuah chuan zirlai zawng zawngte chhuah zalen an nih thu a sawi baw.

Naupangte hi March ni 7 khan silai kengten Kuriga school atangin an hruaichhuak a, ramhnuai lamah an luhpui a ni. School thuneitute chuan zirlai naupang 287 an hruaibo thu an sawi a, naupang 100 vel chu kum 12 leh a hnuai lam mi an ni.

Nigerian sipai thupuangtu Major General Edward Buba chuan Zamfara state-ah naupang 137 chhanchhuah an nih thu a sawi a. Naupang hren dang chhuah an nih a, mifirfiakte man an nih hma chuan hma an lak zawm zel tur thu a sawi.

(NewsOnAIR)

<><><>